

SIÐAREGLUR

stjórnenda hjá Fjarðabyggð

1. grein - Markmið

Markmið reglnanna er að skilgreina það háttæmi sem ætlast er til að stjórnendur Fjarðabyggðar sýni af sér við störf sín fyrir hönd sveitarfélagsins Jafnframt að upplýsa íbúa um þær kröfur sem þeir geta gert til stjórnenda. Með stjórnendum er átt við bæjarstjóra, sviðsstjóra og forstöðumenn stofnana Fjarðabyggðar, nema annað sé tiltekið.

2. grein - Trúnaður

Stjórnendur skulu gæta þagnarskyldu um það sem þeir fá vitneskju í starfi sínu og leynt á að fara samkvæmt lögum, reglum eða eðli máls. Þeir skulu virða trúnað um ummæli einstakra fundarmanna á lokuðum fundum í nefndum og ráðum Fjarðabyggðar og um innihald skjala eða annarra gagna er þeir fá aðgang að starfs síns vegna og trúnaður skal ríkja um. Trúnað ber að halda áfram eftir að störfum lýkur.

3. grein - Gæsla almannahagsmuna

Stjórnendur skulu í störfum sínum fylgja lögum, reglum, samþykktum Fjarðabyggðar og sannfæringu sinni. Þeir skulu gæta almannahagsmuna og hagsmuna sveitarfélagsins, auk þess sem þeim ber að hafa í heiðri grundvallaratriði góðrar stjórnsýslu. Þeir skulu líta á Fjarðabyggð sem eina heild og gæta hagsmuna allra bæjarhluta.

4. grein - Upplýsingagjöf

Stjórnendum ber að svara fyrirspurnum almennings um framkvæmd þeirra starfa sem þeir bera ábyrgð á. Þeim ber ekki að veita neinar trúnaðarupplýsingar eða upplýsingar er varða einkalíf kjörinna fulltrúa, annarra stjórnenda eða þriðja aðila.

5. grein – Háttvísi, virðing og valdmörk

Í störfum sínum skulu stjórnendur koma fram af háttvísi. Þeim ber að virða ákvörðunarvald, réttindi og hlutverk kjörinna fulltrúa og starfsmanna sveitarfélagsins. Þeir mega ekki hvetja eða aðstoða kjörinn fulltrúa eða starfsmann Fjarðabyggðar við að brjóta þær meginreglur sem hér eru settar fram. Þeir mega ekki hlutast til um að starfsmenn eða kjörnir fulltrúar geri neitt það sem hefur þann tilgang að verða þeim á beinan eða óbeinan hátt til hagsmunalegs ávinnings, né heldur aðila nátengdum þeim eða ákveðnum hópum eða fyrirtækjum. Stjórnendur skulu einnig gæta þess að nýta sér ekki óopinberar upplýsingar til að hagnast á þeim persónulega eða hjálpa öðrum til þess.

6. grein - Gjafir og fríðindi

Stjórnendum er óheimilt að þiggja gjafir, fríðindi eða önnur hlunnindi frá viðskiptamönnum, eða þeim sem leita eftir þjónustu Fjarðabyggðar, ef líta má á slíkt sem endurgreiðslu fyrir greiða eða sérstaka þjónustu. Boðsferðir af öllu tagi skulu lagðar fyrir bæjarráð til umfjöllunar og samþykktar með rökstuðningi.

7. grein - Hagsmunaárekstrar

Stjórnendur skulu forðast hagsmunaárekstra í störfum sínum. Þegar stjórnandi á óbeinna eða beinna persónulegra hagsmuna að gæta í máli sem er til umfjöllunar hjá sveitarfélaginu, skal hann gera grein fyrir þessum hagsmunum áður en umræður fara fram og atkvæði eru greidd.

Stjórnendum sem sitja í stjórnunum í einkareknum eða opinberum félögum, sem gætu átt hagsmuna að gæta vegna beinna eða óbeinna viðskipta við bæjarfélagið, ber að upplýsa um slíkt. Fjármálasvið heldur skrá um fjárhagslega hagsmuni bæjarstjóra og sviðsstjóra sveitarfélagsins, svo og trúnaðarstörf þeirra, í samræmi við reglur þar um. Ef stjórnandi telur vafa leika á um hagsmunaárekstra í starfi sínu skal hann bera málið upp við yfirmann sinn.

8. grein - Ábyrgð í fjármálum

Stjórnendum ber að virða fjárhagsáætlun og grundvallarreglur um fjármálastjórn sem tryggja réttmæta og ábyrga meðferð á almannafé íbúa Fjarðabyggðar. Við störf sín skulu þeir ekki aðhafast neitt sem felur í sér misnotkun á almannafé, s.s einkanotkun á byggingum bæjarins, bílum, tækjum eða verkfærum, nema slík notkun falli undir heimildir sem ákveðnar eru af bæjarstjórn. Stjórnendur skulu virða stjórnsýslueftirlit og -úttektir, sem framkvæmdar eru af endurskoðendum bæjarins og öðrum til þess völdum aðilum, og leggja sitt af mörkum til þess að markmið þess náist.

9. grein – Stöðuveitingar

Stjórnendum ber að tryggja að störf eða stöðuveitingar byggist á hæfi einstaklingsins eingöngu og að hæfasti einstaklingurinn sé ávallt valinn í viðkomandi starf. Stjórnendur skulu í starfi sínu ekki gera neitt sem veitir þeim starfslegan ávinning í starfi eða eftir að þeir hafa látið af störfum.

10. grein - Miðlun

Stjórnendum ber að tileinka sér þessar siðareglur, lýsa því yfir að þeir séu reiðubúnir til að hafa þessar siðareglur að leiðarljósi og staðfesti þann vilja með undirskrift sinni. Siðareglur Fjarðabyggðar á hverjum tíma skulu vera hluti af starfsskyldum stjórnenda bæjarins. Þær skulu vera aðgengilegar starfsfólki sveitarfélagsins og fjölmiðlum, til að þessir aðilar geti gert sér grein fyrir þeim.

11. grein - Gildistaka og endurskoðun

Reglur þessar taka gildi með samþykkt í bæjarstjórn Fjarðabyggðar og skulu ávallt endurskoðaðar fyrir lok árs á fyrsta starfsári nýkjörinnar bæjarstjórnar.

Fjarðabyggðar 19. júlí 2018


Gunnar Jónsson
bæjarritari

Samþykkt í bæjarstjórn 12. apríl 2012.

Samþykkt í bæjarráði í umboði bæjarstjórnar 16. júlí 2018, í kjölfar sameiningar Breiðdalshrepps og Fjarðabyggðar.